

# INUIT ATAQATIGIIT

## INATSISARTUNI



22.12.2022

UPA2023/63

Inatsisartut Suleriaasianni § 33 naapertorlugu aalajangiiffigisassatut siunnersuut imattoq matumuuna saqqummiuppara:

**Inuit innarluutillit tapersorsorneqarnissaannut Inatsisartut Inatsisaata allanngortinneqarnernissaa siunertaralugu, Naalakkersuisut Inatsisartut Inatsisaannik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut. Inatsimmik allanngortitsinermi angajoqqaat, angajoqqaatut sinniisut ilaqtariillu namminerisaminnik ikiorseqarnissamut pisinnaatitaanerat §8-mi allassimasunngortinneqassaaq. Inatsisartut Inatsisissaattut siunnersuut kingusinnerpaamik UPA2024-mi saqqummiunneqassaaq.**

(Inatsisartunut ilaasortaq Agathe Fontain, Inuit Ataqatigiit)

### Tunngavilersuut:

Innarluutilimmik, eqqarsartaatsikkullu napparsimasumik qitornaqarneq, angajoqqaanut assigiinngitsunik eqquisarpoq, ilaat oqinnerusumik ilaalli annertuumik eqquisartunik.

Nammineq misigisimangikkaanni takorlooruminnaassaqaaq. Angajoqqaatut ummatikkut anniarneq, ernumaneq, apeqquterpassuit soorlu; qimagukkumami qitornara kiap isumagissavaa?

Piviusumik anaanap eqqarsartaatsikkut napparsimasumik qitornallip oqaasii tusartilaarlakka : "Suliartortariaqartarpunga qitornara qimallugu, ernumallunga angerlassaanga eqqarsarlunga meerara imminorsimassooq."

# INUIT ATAQATIGIIT

## INATSISARTUNI



Taamatut inuuneqarneq, inummut peqqinnanngilluinnarpoq. Angajoqqaaq peqqinngitsoq, qitornarisamut pisariaqartitsisumut tapersersuinissaa amigalissaaq.

Inatsimmi § 8-mi allaqqavoq: *"Inuit innarluutillit pisariaqartitaminnut tapersorsorneqarnermik pisarnissaat, aamma Inatsisartut inatsisaat manna malillugu inunnut innarluutilinnut tapersiinissamut periarfissanik pisariaqartunik peqarnissaa, kommunalbestyrelsip isumagissavaa."*

Isumaqpunga innarluutillip pineqartup angajoqqaani pisariaqartikkai.

Angajoqqaavili aamma nammineq atukkanut artornartunut qaangiiniarnissaminnut ikiorserneqarnissaminnik pisariaqartitsipput. Pisariaqartitsipput tarnip pissussaanik ilisimasalimmik, allanilluunniit inulerinermik ilinniarsimasunik katsorsarneqarnissamik. Tamannarpiaarlutunngavingalugu siunnersuut manna saqqummiuppara.

Taamaammat siunnersuutigaara, Inuit innarluutillit tapersorsorneqarnissaannut Inatsisartut Inatsisaat angajoqqaat ikiorserneqarsinnaanermik pisariaqartitsinertik aallaavigalugu inatsisitigut periarfissinneqarnerat ilanngunneqassasoq.

Neriuppunga siunnersuut manna tigulluarneqarumaartoq.

### **Pisortanut aningaasatigut allaffissornikkullu kingunerisassai:**

Missingerneqarpoq siunnersuut AC-fuldmægtigip ukiup marluk sulineratut 1. mio. koruunit naliganut akeqassasoq.

### **Namminersortunut aningaasatigut allaffissornikkullu kingunerisassai:**

Namminersorluni inuussutissarsiuteqartunut ajornannnginnerusumik allaffissornikkut qinnuteqaasiornissamut siunnersuut iluaqutaassaaq.

# INUIT ATAQATIGIIT INATSISARTUNI



**Innuttaasunut aningaaasatigut allaffissornikkullu kingunerisassai:  
Soqanngilaq.**